

**Bosna i Hercegovina
Federacija Bosne i Hercegovine
TUZLANSKI KANTON
Ministarstvo zdravstva**

**IZVJEŠTAJ
O RADU MINISTARSTVA ZDRAVSTVA
ZA 2012. GODINU**

Tuzla, mart 2013.godine

Na osnovu člana 95. Zakona o organizaciji organa uprave u Federaciji Bosne i Hercegovine („Službene novine Federacije Bosne i Hercegovine“, broj:35/05) i tačke XV Odluke o metodologiji izrade i donošenja programa rada i izvještaja o radu Vlada Tuzlanskog kantona, kantonalnih organa uprave i upravnih organizacija („Službene novine Tuzlanskog kantona“, broj:15/11) Ministarstvo zdravstva Tuzlanskog kantona podnosi

IZVJEŠTAJ O RADU MINISTARSTVA ZDRAVSTVA TUZLANSKOG KANTONA ZA 2012. GODINU

I Uvodni dio

Programom rada Vlade u 2012.godini u oblasti zdravstva planirano je da će se voditi aktivnosti u pravcu osiguranja mjera na uređenju i vođenju zdravstvene politike i provođenju reforme iz oblasti zdravstva od interesa za područje kantona u cilju osiguranja uslova, da svi građani i osigurana lica na području Tuzlanskog kantona mogu ostvariti pravo na zdravstvenu zaštitu i mogućnost ostvarivanja najvišeg mogućeg nivoa zdravlja kroz sistem zdravstvene zaštite, u oblasti zdravstva.

Vođene su aktivnosti u pravcu osiguranja mjera na uređenju i vođenju zdravstvene politike i provođenju reforme iz oblasti zdravstva od interesa za područje Kantona. Aktivnosti su usmjerene na stvaranju uvjeta za pristupačnost i ujednačenost korištenja primarne i sekundarne zdravstvene zaštite, na reorganizaciji rada zdravstvenih ustanova, uspostavljanje sistema poboljšanja kvaliteta i sigurnosti zdravstvene zaštite, praćenju zdravstvenog stanja stanovništva i rada zdravstvenih ustanova na području Kantona, kao i staranje o provođenju utvrđenih prioriteta u zdravstvenoj zaštiti.

Kao prioritetan cilj u 2012. godini planirana je koordinacija aktivnosti na izradi i realizaciji programa restrukturiranja i finansijske samoodrživosti JZU UKC Tuzla što će se realizovati kroz: donošenje Izmjena i dopuna Statuta JZU UKC Tuzla, donošenje Pravilnika o unutrašnjoj organizaciji i sistematizaciji radnih mjesta i donošenje srednjoročnog Programa mjera za saniciju akumuliranog negativnog finansijskog rezultata i uravnoteženo poslovanje. Vlada Tuzlanskog kantona i Ministarstvo zdravstva su u saradnji sa Upravnim odborom i Direktorom JZU UKC Tuzla realizovali sve navedene aktivnosti, što je prema podacima iz Izvještaja o radu i poslovanju JZU UKC Tuzla za 2012.godinu rezultiralo značajnim smanjenjem gubitka u 2012.godini u odnosu na ranije izvještajne periode.

Planom i programom mjera za unapređenje zdravstvene zaštite iz obaveznog zdravstvenog osiguranja za područje Tuzlanskog kantona za 2012 i 2013. godinu, Ministarstvo zdravstva je utvrdilo posebne mjere za unapređenje određenih zdravstvenih djelatnosti koje se pružaju u JZU UKC Tuzla, te izvršilo prilagođavanje standarda i normativa zdravstvene zaštite, što je za rezultat imalo kvalitetniju zdravstvenu uslugu za pacijenta i finansijsku održivost ustanove. U cilju daljeg razvoja UKC-a data je podrška daljem razvoju transplant programu kao najsofisticiranijem programu u zdravstvu općenito, čime se stvaraju preduslovi za liderstvo i dobivanje statusa referalnog centra u BiH.

Pokrenute su inicijative i razgovori putem Federalnog ministarstva zdravstva za reorganizaciju i usklađivanje bolničkih zdravstvenih ustanova na području Federacije BiH/Tuzlanskog kantona, što podrazumijeva i preuzimanje osnivačkih prava u skladu sa Zakonom o zdravstvenoj zaštiti.

Formiran je Tim za verifikaciju timova porodične /obiteljske medicine na Tuzlanskom kantonu sa zadatkom da utvrdi ispunjenost uslova za dodjelu ugovora za svaki tim pojedinačno. Provođenje monitoringa i evaluacije rada uspostavljenog sistema porodične medicine na cijelom području Tuzlanskog kantona kao i ocjena i priznavanje timova porodične medicine vršena je u skladu sa Instrukcijom o ispunjavanju osnovnih uvjeta za priznavanje porodične medicine i Uputstvom za provedbu Instrukcije o ispunjavanju osnovnih uvjeta za priznavanje porodične medicine koje je donijelo Ministarstvo zdravstva. Verificirano je 228 timova porodične medicine sa jasnim zadacima za unapređenje rada timova u roku od šest mjeseci, kada će biti slijedeća verifikacija.

U cilju unapređenja konsultativno - specijalističke djelatnosti u toku 2011., 2012. i planom za 2013. godine uspostavljan je novi način organizacije i funkcionisanja konsultativno - specijalističke djelatnosti u skladu sa Instrukcijom o načinu organizovanja i finansiranja konsultativno – specijalističke djelatnosti na području Tuzlanskog kantona. Osiguranim licima omogućena je dostupnost u ostvarivanju prava iz konsultativno – specijalističke djelatnosti kroz direktno ugovaranje zdravstvenih usluga između Zavoda i zdravstvenih ustanova, a pod nadzorom JZU UKC Tuzla.

Ministarstvo zdravstva je donijelo Plan i program mjera za unapređenje zdravstvene zaštite iz obaveznog zdravstvenog osiguranja za područje Tuzlanskog kantona za 2012. i 2013. godinu na prijedlog Zavoda za javno zdravstvo TK. Utvrđeni su Programi zdravstvene zaštite o pružanju zdravstvenih usluga iz obaveznog zdravstvenog osiguranja za 2013. godinu na području Tuzlanskog kantona.

Ministarstvo je u toku 2012. godine realizovalo sve planske i programske aktivnosti koje su planirane Programom rada Vlade Tuzlanskog kantona za 2012.godinu.

II Normativni dio

-Programirani propisi koje je donijela Vlada

U 2012.godini u dijelu normativno pravnih aktivnosti, donesene su:

- Smjernice za izradu finansijskog plana Zavoda zdravstvenog osiguranja Tuzlanskog kantona za 2012.godinu,
- Finansijski plan Zavoda zdravstvenog osiguranja Tuzlanskog kantona za 2012. godinu,
- Odluka o Pozitivnoj listi lijekova Tuzlanskog kantona,
- Smjernice za izradu finansijskog plana Zavoda zdravstvenog osiguranja Tuzlanskog kantona za 2013.godinu,
- Nacrt programa rada Ministarstva zdravstva za 2013.godinu.

-Programirani propisi koje nije donijela Vlada

Programom rada Vlade za mjesec decembar bilo je predviđeno donošenje Finansijskog plana Zavoda zdravstvenog osiguranja Tuzlanskog kantona za 2013. godinu. Ministarstvo zdravstva je u saradnji sa Zavodom zdravstvenog osiguranja TK pripremlilo i dostavilo Vladi na razmatranje Finansijski plan Zavoda zdravstvenog osiguranja Tuzlanskog kantona za 2013.godinu, ali zbog povezanosti s Bužetom Tuzlanskog kantona isti nije razmatran.

Donesena je Odluka o privremenom finansiranju iz obaveznog zdravstvenog osiguranja u Tuzlanskom kantonu za period 01.01. do 31.03.2013.godine.

-Neprogramirani propisi koje je donijela Vlada

Pored programiranih aktivnosti, na osnovu ukazane potrebe, a na prijedlog Ministarstva zdravstva, Vlada Tuzlanskog kantona je donijela:

- Odluku o Listi lijekova koji se propisuju i izdaju na teret sredstava Zavoda zdravstvenog osiguranja Tuzlanskog kantona
- Odluke o imjenama i dopunama Odluke o Listi lijekova koji se propisuju i izdaju na teret sredstava Zavoda zdravstvenog osiguranja
- Odluku o izmjenama i dopunama Odluke o ostvarivanju prava iz primarne zdravstvene zaštite povratnika u Republiku Srpsku u JZU Dom zdravlja na području Tuzlanskog kantona.
- Izmjene i dopune Finansijskog plana Zavoda zdravstvenog osiguranja Tuzlanskog kantona za 2012.godinu, koje su usvojene Odlukom Upravnog odbora Zavoda zdravstvenog osiguranja TK, broj 01-05-1-156/12 od 07.11.2012.godine,
- Izmjene i dopune Operativnog programa zdravstvene zaštite i zdravstvenog osiguranja za 2012.godinu, koje su usvojene Odlukom Upravnog odbora Zavoda zdravstvenog osiguranja TK, broj 01-05-1-157/12 od 07.11.2012.godine,
- Odluku o izmjenama i dopunama Odluke o utvrđivanju osnovica, stope i načinu obračunavanja i uplate doprinosa za obavezno zdravstveno osiguranje na području Tuzlanskog kantona.

-Programirana studijsko analitička i informativna djelatnost

U 2012.godini u dijelu studijsko analitičkih i stručno operativnih poslova koji su predviđeni Programom rada Vlade Tuzlanskog kantona, na prijedlog Ministarstva zdravstva Vlada je razmatrala:

- Izvještaj o radu Ministarstva zdravstva za 2011. godinu,
- Izvještaj o izvršenju Finansijskog plana Zavoda zdravstvenog osiguranja Tuzlanskog kantona za 2011. godinu,
- Izvještaj o radu JZU Univerzitetski klinički centar Tuzla za 2011.godinu,
- Izvještaj o poslovanju Zavoda za javno zdravstvo Tuzlanskog kantona za 2011. godinu
- Izvještaj o obračunu sredstava u zdravstvu na području Tuzlanskog kantona za 2011.godinu,
- Izvještaj o izvršenju finansijskog plana Zavoda zdravstvenog osiguranja Tuzlanskog kantona za period 01.01.-30.06.2012. godine,
- Informacija o obezbjeđenju rezerve krvi za potrebe liječenja građana Tuzlanskog kantona sa osvrtom na status dobrovoljnih davalaca krvi i mogućnosti obezbjeđenja krvi kao lijeka za 2011. Godinu,
- Analiza zdravstvenog stanja stanovništva Tuzlanskog kantona i indikatori zdravlja u 2011.godini, sa prijedlogom mjera,
- Izvještaj o izvršenju finansijskog plana Zavoda zdravstvenog osiguranja Tuzlanskog kantona za period 01.01.-30.09.2012. godine,
- Nacrt Program rada Ministarstva zdravstva za 2013.godinu,
- Izmjene i dopune Finansijskog plana Zavoda zdravstvenog osiguranja Tuzlanskog kantona za 2011.godinu, i Izmjene i dopune Operativnog programa zdravstvene zaštite i zdravstvenog osiguranja za 2011.godinu.

-Propisi i provedbeni akti koje je donio ministar zdravstva

Ministarstvo je u cilju efikasnijeg provođenje reforme u zdravstvenom sistemu, u skladu sa Zakonom o zdravstvenoj zaštiti i podzakonskim aktima, donijelo slijedeće provedbene akte:

- Instrukciju o načinu organizovanja i finansiranja specijalističko-konsultativne djelatnosti na području Tuzlanskog kantona,
- Odluku o Listi ampuliranih lijekova koji se primjenjuju u zdravstvenim ustanovama primarne zdravstvene zaštite na području Tuzlanskog kantona,
- Donesen je Plan i program mjera za unapređenje zdravstvene zaštite iz obaveznog zdravstvenog osiguranja za područje Tuzlanskog kantona za 2013. godinu,
- Pravilnik o unutrašnjoj organizaciji Ministarstva zdravstva.

III Tematski dio

Zdravstvena zaštita i zdravstveno osiguranje

Zdravstvena zaštita i zdravstveni osiguranje u Tuzlanskom kantonu se provode u skladu sa Zakonom o zdravstvenoj zaštiti („Službene novine Federacije Bosne i Hercegovine“, broj:46/10) i Zakonom o zdravstvenom osiguranju FBiH. („Službene novine Federacije Bosne i Hercegovine“, broj: 30/97, 7/02,70/08 i 48/11).

Zdravstvena djelatnost se organizira i provodi kao:

- primarna zdravstvena zaštita
- specijalističko-konsultativna i
- bolnička zdravstvena zaštita.

Obaveznim zdravstvenim osiguranjem osiguranim licima obezbjeđuje se pružanje zdravstvene zaštite i druga prava utvrđena Zakonom. Finansiranje prava iz obaveznog zdravstvenog osiguranja vršeno je u skladu sa Finansijskim planom, polazeći od raspoloživih sredstava, utvrđenog standarda zdravstvene zaštite i programa mjera za provođenje obaveznog zdravstvenog osiguranja.

-Programiranje zdravstvene zaštite i evaluacija

Program zdravstvene zaštite o pružanju zdravstvenih usluga iz obaveznog zdravstvenog osiguranja predstavlja skup zdravstvenih usluga i programa utvrđenih po sadržaju i obimu po nivoima i djelatnostima zdravstvene zaštite u cilju očuvanje i unapređenja, sprječavanja bolesti i liječenja na području općine, kantona i Federacije Bosne i Hercegovine.

U 2012.godini počela je primjena Odluke o jedinstvenoj metodologiji kojom se bliže utvrđuju kriteriji i mjerila za zaključivanje ugovora između nadležnog zavoda zdravstvenog osiguranja i zdravstvene ustanove, koju je usvojio Upravni odbor Zavoda zdravstvenog osiguranja i reosiguranja Federacije Bosne i Hercegovine uz predhodnu saglasnost Federalnog ministarstva zdravstva, s tim da se ista u 2012.godini testirati nakon čega bi se izvršile eventualne izmjene i dopune.Jedinstvenom metodologijom se bliže utvrđuju kriteriji i mjerila koji predstavljaju obavezni minimalni polazni osnov za ugovaranje pružanja usluga zdravstvene zaštite s ciljem ujednačavanja uslova u korištenju zdravstvene zaštite iz obaveznog zdravstvenog osiguranja, kao i zaključivanja ugovora između Zavoda zdravstvenog

osiguranja i reosiguranja Federacije Bosne i Hercegovine, odnosno kantonalnih zavoda zdravstvenog osiguranja i zdravstvene ustanove odnosno privatnog zdravstvenog radnika. Jedinstvenom metodologijom je utvrđeno da se Programi zdravstvene zaštite o pružanju zdravstvenih usluga donose na nivou svakog kantona. Kantonalni program zdravstvene zaštite sadrži programe zdravstvene zaštite za svaku općinu za koju je nadležan kanton uvažavajući specifičnosti određenog općinskog područja.

Programom zdravstvene zaštite utvrđuju se vrste i potrebe za zdravstvenim uslugama sva tri nivoa zdravstvene zaštite, kadrovi potrebni za pružanje ovih usluga, broj bolničkih postelja na jedan (1) tim, kao i standard broja osiguranih osoba po zdravstvenom timu.

Program zdravstvene zaštite temelji se na demografskoj analizi, analizi i ocjeni zdravstvenog stanja osiguranih lica u prethodnoj godini, identifikaciji problema u provođenju programa zdravstvene zaštite i finansiranju u prethodnoj godini i ocjeni prioriteta u narednoj godini. U cilju što uspješnijeg i ekonomičnijeg unapređenja zdravlja i liječenja programom zdravstvene zaštite se obezbjeđuje pružanje određenog obima i sadržaja zdravstvenih usluga za osigurana lica – korisnike, radi zadovoljenja njihovih potreba.

Opći ciljevi zdravstvene zaštite su:

- Smanjenje smrtnosti;
- Produženje prosječnog trajanja života;
- Podizanje radnih i kreativnih sposobnosti;
- Osiguranje povoljne životne i radne sredine.

Specifični ciljevi zdravstvene zaštite su:

1. Unaprijediti zdravstvenu zaštitu stanovništva, a posebno rizičnih grupa i time poboljšati zdravstveno stanje stanovništva.
2. Disperzijom zdravstvenih kapaciteta približiti zdravstvenu djelatnost stanovništvu i time sve stanovnike staviti u približno isti položaj po pitanju mogućnosti korištenja zdravstvene zaštite.
3. Mjerama prevencije, rane dijagnostike i odgovarajuće terapije omogućiti proizvođenje maksimalnih efekata iz raspoloživih zdravstvenih resursa.
4. Poduzimanje mjera i aktivnosti na unapređenju higijenskih uslova u životnoj i radnoj sredini.
5. Podizanje nivoa zdravstvene kulture stanovništva.
6. Unapređenje odnosa zdravstveni radnik – pacijent, a posebno kad su u pitanju osjetljive populacione grupe.

Na osnovu dostavljenog Prijedloga plana i programa mjera za unapređenje zdravstvene zaštite iz obaveznog zdravstvenog osiguranja za područje Tuzlanskog kantona za 2013. godinu, koji je sačinio Zavod za javno zdravstvo TK, Ministar je donio Plan i program mjera za unapređenje zdravstvene zaštite iz obaveznog zdravstvenog osiguranja za područje Tuzlanskog kantona za 2013. godinu, kojim su utvrđeni ciljevi i mjere za unapređenje zdravstvene zaštite koje predstavljaju osnovu za utvrđivanje dodatnih kriterija i pripadajućih dijelova programa zdravstvene zaštite, a koji će biti sastavni dio programa zdravstvene zaštite o pružanju zdravstvenih usluga iz obaveznog zdravstvenog osiguranja na području Tuzlanskog kantona za 2013. godinu.

Na osnovu Programa Ministarstvo zdravstva TK je za 2013. godinu, utvrdilo dodatne kriterije za obezbjeđivanje zdravstvene zaštite i pripadajuće dijelove programa za nivo zdravstvene zaštite i to:

Dodatni kriteriji za obezbjeđivanje zdravstvene zaštite iz obaveznog zdravstvenog osiguranja:

1. Zdravstvene usluge medicinskog transporta
2. Usluge uzimanja i dostave laboratorijskih uzoraka
3. Prilagođavanje kapitacije odnosu broja korisnika ambulanti iz mreže i broja korisnika iz normativa
4. Udaljenost ambulanti timova porodične medicine od sjedišta JZU DZ
5. Naknada na ime dostupnosti zdravstvene zaštite
6. Zdravstvena zaštita osiguranih lica smještenih u ustanove socijalne zaštite na području TK
7. Laboratorijske usluge za lica na hroničnoj i peritonealnoj dijalizi
8. Laboratorijske usluge za osigurana lica kojima je urađena transplantacija organa ili tkiva
9. Stručno- medicinski nadzor nad obavljanjem specijalističko-konsultativne djelatnosti

Za obezbjeđivanje zdravstvene zaštite iz obaveznog zdravstvenog osiguranja, zasnovane na utvrđenim načelima zdravstvene zaštite, definisani su pripadajući dijelovi programa zdravstvene zaštite i to:

1. Zdravstvena zaštita učenika i studenata
2. Specifična i preventivna zdravstvena zaštita djece predškolskog i školskog uzrasta koji se bave sportom
3. Rana dijagnostika karcinoma dojke i karcinoma grlića maternice
4. Zdravstvena zaštita osiguranih lica sa oštećenjem sluha, glasa i govora
5. Program asistirane reprodukcije /oplodnje
6. Edukacija uposlenika Službi hitne medicinska pomoći
7. Bolnička i vanbolnička dijagnostika- CT, MRI, RAC
8. Palijativna njega – HOSPIS
9. Multidisciplinarna intenzivna njega bolničke zdravstvene zaštite nivoa klinike za dječije bolesti
10. Intenzivna njega bolničke zdravstvene zaštite tercijarnog nivoa klinike za interne bolesti
11. Intenzivna njega bolničke zdravstvene zaštite tercijarnog nivoa klinike za anesteziologiju i ranimatologiju
12. Vitreoretinalna hirurgija
13. Rana dijagnostika kolorektalnog karcinoma
14. Program neurologije nivoa opće bolnice
15. Program ortopedije i traumatologije sekundarnog i tercijarnog nivoa bolničke zdravstvene zaštite

U okviru programa Zavoda za javno zdravstvo TK planirano je 0,5 tima za djelatnost

„Specifična preventivna zdravstvena zaštita školske djece i omladine u školama i fakultetima“

Ministarstvo zdravstva je u cilju realizacije programa izvršilo i prilagođavanje standarda za pojedine zdravstvene djelatnosti.

Na prijedlog Zavoda za javno zdravstvo Tuzlanskog kantona utvrđeni su programi zdravstvene zaštite:

- Program zdravstvene zaštite osiguranih lica sa područja 13 općina Tuzlanskog kantona za 2013. godinu;
- Program stacionarne zdravstvene zaštite nivoa Opće bolnice Gračanica za 2013. godinu;
- Program stacionarne zdravstvene zaštite nivoa Opće i Kantonalne bolnice i Kliničkog centra Tuzla za 2013. godinu;

- Program zdravstvene zaštite iz obaveznog zdravstvenog osiguranja za područje Tuzlanskog kantona za 2013. godinu.

Evaluacija kao skup procedura ocjenjuje proces i rezultat, te predstavlja stav neprekidnog ispitivanja i dobivanja informacija. Evaluacija kao kontinuirani proces podrazumijeva planiranje, primjenu procedura, evaluaciju rezultata i donošenje odluka.

Praćenje izvršenja Programa zdravstvene zaštite vrši se preko dokumentacije koju javne zdravstvene ustanove dostavljaju Zavodu za javno zdravstvo. Na osnovu ocjene programa zdravstvene zaštite i izvještaja o radu za svaku programiranu djelatnost daju se prijedlozi ocjene izvršenja programa. Urađeni su izvještaji za prvih šest mjeseci 2012.godine i izvještaji za 2012. godinu.

-Zdravstveno osiguranje i finansiranje zdravstvene zaštite

Ustavom Federacije Bosne i Hercegovine podijeljena je nadležnost u oblasti zdravstvenog osiguranja i zdravstvene zaštite između Federacije i kantona, a obim i ostvarivanje prava iz zdravstvenog osiguranja i zdravstvene zaštite direktno je ovisan o materijalnim mogućnostima kantona.

Prema podacima Federalnog zavoda za statistiku na području Federacije Bosne i Hercegovine procijenjeno je 2.338.277 stanovnika od čega na području Tuzlanskog kantona na dan 30.06.2012. godine 499.099 stanovnika odnosno 21,34% stanovništva Federacije Bosne i Hercegovine.

Na osnovu podataka jedinstvenog sistema na zdravstveno osiguranje kod Zavoda zdravstvenog osiguranja Tuzlanskog kantona na dan 31.12.2012. godine prijavljeno je 446.180 osiguranih lica što je za 1,71% više u odnosu na isti dan prethodne godine od čega su 260.808 osiguranici odnosno 58,45% a 185.372 članovi porodica odnosno 41,55%.

Ministarstvo zdravstva je u kladu sa svojim ovlaštenjima iz člana 82. stav 2. Zakona o zdravstvenom osiguranju („Službene novine Federacije BiH“ broj:30/97, 7/02,70/08 i 48/11), u saradnji sa Upravnim odborom Zavoda zdravstvenog osiguranja sačinilo godišnji plan prihoda i rashoda za finansiranje polazeći od raspoloživih sredstava, utvrđenog standarda zdravstvene zaštite i programa mjera za provođenje obaveznog zdravstvenog osiguranja.

Specifičnosti funkcionisanja sistema finansiranja zdravstvene zaštite ogledaju se u nemogućnosti realnog predviđanja određenih kategorija rashoda (lijekovi sa esencijalne liste, naknade plaća zbog bolovanja, liječenje van Kantona i ortopedska i druga pomagala) što diktira zdravstveno stanje stanovništva

Sredstva za finansiranje prava iz obaveznog zdravstvenog osiguranja u 2012.godini ostvarena su u iznosu od 196.289.578 KM što je za 3.956.931 KM ili 1,98% manje od planiranih, a za 2,18% više u odnosu na 2011.godinu

U cilju održavanja dostignutog nivoa finansiranja prava iz zdravstvenog osiguranja, rashodi i kapitalni izdaci Zavoda u 2012.godini ostvareni su u iznosu od 195.954.753 KM što je za 4.294.756 KM ili 2,14% manje od planiranih, a za 2,01% više u odnosu na 2011. Godinu.

Prosječna potrošnja po osiguranom licu u 2012.godini iznosi 439,18 KM, što je za 0,17% manje u odnosu na 2011.godinu

Rashodi neposredne zdravstvene zaštite realizovani su u iznosu od 140.363.454 KM što je za 2.624.385 KM ili 1,84% manje od planiranih, a za 2,29% više u odnosu na 2011. godinu.

U ukupnoj strukturi rashoda:

- neposredna zdravstvena zaštita učestvuje sa 71,63%,
- lijekovi - 19,77%,
- ortopedska i druga medicinska pomagala - 2,04%,
- tekući transferi i drugi tekući rashodi (naknade plaća zbog privremene spriječenosti za rad na teret zdravstvenog osiguranja i ostali tekući transferi) –4,12%,
- Stručna služba Zavoda 1,64%,
- liječenje van Kantona i inostranstvu 0,58%,
- kapitalni izdaci 0,10% i
- ostali rashodi 0,13%.

U strukturi neposredne zdravstvene zaštite u skladu sa potpisanim ugovorima:

- primarna zdravstvena zaštita učestvuje sa 44,34%,
- bolnička zdravstvena zaštita sa 49,68% od čega: JZU UKC Tuzla 46,04%, Opšta bolnica Gračanica 2,56% i JZU Centar za fizikalnu medicinu, rehabilitaciju i bansko liječenje «Ilidža» Gradačac 1,07%,
- farmaceutske usluge 2,02%,
- javnozdravstvena djelatnost 0,74%
- bolnička i vanbolnička dijagnostika 3,23% (UKC Tuzla 2,41%, Plava poliklinika 0,24%, Poliklinika Azabagić 0,40% i Dom zdravlja Lukavac 0,18%).

Zdravstvene ustanove su u obavezi da, ne narušavajući dostignuti obim prava osiguranih lica i kvaliteta zdravstvene zaštite, kontinuirano provode mjere unutrašnje racionalizacije na svim nivoima, a u cilju stvaranja mogućnosti za dalje tehničko opremanje i obezbjeđenje ugovorenih usluga.

Ukupni rashodi za lijekove u 2012. godini ostvareni su u iznosu 38.732.987 KM, što je 98,80% u odnosu na planirane u skladu sa Finansijskim planom Zavoda zdravstvenog osiguranja Tuzlanskog kantona za 2012. godinu a za 2,55% više u odnosu na ostvarene u 2011. godine.

Rashodi za lijekove sa Liste lijekova u 2012. godini ostvareni su u iznosu od 37.863.086 KM, što je 99,05% u odnosu na planirane a za 1,96% više u odnosu na ostvarene u 2011. godini i čine 97,75% ukupnih rashoda za lijekove.

Prosječna potrošnja lijekova po osiguranom licu iznosi 86,81 KM što je za 0,82% ili 0,71 KM više u odnosu na ostvarene u 2011. godini, dok prosječna potrošnja lijekova po stanovniku iznosi 77,61 KM .

Rashodi za usluge liječenja van Kantona, pri čemu je pravo na liječenje van kantona ostvarilo 890 osiguranih lica, realizovani su u iznosu od 806.405 KM što je za 101.662 KM ili 1,12% manje od planiranih i čine 0,41% ukupnih rashoda i kapitalnih izdataka.

Rashodi za ortopedska i druga medicinska pomagala ostvareni su u iznosu od 3.994.991 KM što je za 197.686 KM ili 3,98% manje u odnosu na planirane a za 5,21% više u odnosu na 2011.godinu i čine 2,04% ukupnih rashoda i kapitalnih izdataka.

Pravo na povrat naknada plaća po osnovu 6.122 zahtjeva ostvarilo je 817 pravnih i fizičkih lica pri čemu su realizovani rashodi u iznosu od 7.620.969 KM što je za 379.031 KM ili 4,74% manje u odnosu na planirane, a za 8,77% manje u odnosu na 2011. godinu.

Rashodi i kapitalni izdaci Stručne službe u 2012. godini iznose 3.404.524 KM što je za 397.663 KM ili 10,46% manje od planiranih, a za 1,87% manje u odnosu na 2011.godinu i čine 1,74% ukupnih rashoda i kapitalnih izdataka.

U 2012.godini realizovani su u skladu sa Doktrinarnim pristupima posebni programi:

1. Program asistiranje reprodukcije /oplodnje u 2012.godini, kojim je omogućeno osiguranim licima refundacija sredstava za postupak asistiranje reprodukcije/oplodnje.
2. Program korištenje specijalne dječije hrane i to za osigurana lica u dobi od 0 do 18 godina, za sufinansiranje specijalne dječije hrane u iznosu od maksimalno 50,00 KM.
3. Operativni program za tri osigurana lica (djecu) oboljela od dijabetes melitusa sa utvrđenim komplikacijama. Po ovom posebnom programu obezbijeđena su sredstva za finansiranje nabavke po jedne inzulinske pumpe u vrijednosti do 5.780,00KM, i sredstva za finansiranje potrošnog materijala neophodnog za inzulinske pumpe u iznosu do 338,00KM na mjesečnom nivou.
4. Pokrenuti su početni programi rane dijagnostike za vodeće maligne bolesti na Tuzlanskom kantonu: karcinoma dojke, grlića maternice i kolorektalnog karcinoma, za što su obezbijeđena sredstva u Finansijskom planu ZZO TK za 2012. godinu, što je jedan od prioritarnih zadataka zdravstvenog sistema je i smanjenje smrtnosti u grupi vodećih preventabilnih karcinoma što je moguće postići otkrivanjem malignih bolesti i promoviranjem aktivnosti poput samopregleda i samokontrole kod stanovništva što je od izuzetnog značaja u smislu povećanja svijesti o važnosti rane detekcije malignoma.
Na području Tuzlanskog kantona vodeće su neoplazme pluća, dojke, grlića materice kao i kolona i rektuma. Obzirom da su postojeći standardi za citološku dijagnostiku i mamografiju nedovoljni za efikasnu sekundarnu prevenciju i skrininge, izvršena je korekciju standarda citološke dijagnostike, radiološke i ultrazvučne dijagnostike kao i prilagodbu standarda za djelatnost gastroenterologije.
5. Zdravstvenu zaštitu povratnika u RS realizovana je u skladu sa Odlukom o ostvarivanju prava iz primarne zdravstvene zaštite povratnika u Republiku Srpsku u JZU Dom zdravlja na području Tuzlanskog kantona.

U skladu sa Odlukom o elementima i kriterijima za vrednovanje unapređenja i praćenja kvaliteta rada u zdravstvu i Metodološkog uputstva za praćenje strukture i elemenata za vrednovanje kvaliteta rada ustanova primarne i bolničke zdravstvene zaštite na osnovu dokaza o ispunjenosti kriterija, dostavljene dokumentacije i uvida u procedure na terenu sačinjena je Evaluacija realizacije Programa unapređenja i praćenja kriterija kvaliteta rada u primarnoj i bolničkoj zdravstvenoj zaštiti za 2011.godinu, za sve javne zdravstvene ustanove na području Tuzlanskog kantona.

U cilju unapređenja konsultativno - specijalističke djelatnosti u toku 2011., 2012. i planom za 2013. godine uspostavljan je novi način organizacije i funkcionisanja konsultativno - specijalističke djelatnosti u skladu sa Instrukcijom o načinu organizovanja i finansiranja konsultativno – specijalističke djelatnosti na području Tuzlanskog kantona.

Osiguranim licima omogućena je dostupnost u ostvarivanju prava iz konsultativno – specijalističke djelatnosti kroz direktno ugovaranje zdravstvenih usluga između Zavoda i zdravstvenih ustanova, a pod nadzorom JZU UKC Tuzla.

-Lijekovi

Vlada Tuzlanskog kantona je na prijedlog Ministarstva zdravstva na sjednici održanoj 03.02.2012. godine donijela Odluku o listi lijekova koji se izdaju na teret sredstava Zavoda zdravstvnog osiguranja Tuzlanskog kantona, koja sadrži generičku listu lijekova sa usaglašenim cijenama lijekova.

Ministarstvo zdravstva je provelo postupak izrade Pozitivne liste lijekova u skladu sa općim i posebnim kriterijima za uvrštavanje lijekova na pozitivnu listu lijekova koji su utvrđeni tačkom VIII Federalne odluke, u cilju da se na pozitivnoj listi lijekova osiguranim licima obezbijede kontrolisani i sigurni lijekovi, što je od vitalnog značaja za život i zdravlje pacijenata. Vlada Tuzlanskog kantona je na prijedlog Ministarstva u 2012. godini donijela:

- Odluku o Pozitivnoj listi lijekova Tuzlanskog kantona, koja se primjenjuje od 16.07.2012. godine, a sadržavala je **558** zaštićenih naziva lijekova.
- Odluku o izmjenama i dopunama Pozitivne liste lijekova Tuzlanskog kantona, koja se primjenjuje od 08.09.2012. godine, a sadržavala je **731** zaštićeni naziv lijeka.
- Odlukom o izmjenama i dopunama Pozitivne liste lijekova Tuzlanskog kantona, koja se primjenjuje od 09.11.2012. godine, a sadrži ukupno **780** zaštićenih naziva lijekova.

-Reforma porodične/obiteljske medicine

Zdravstvenu zaštitu po konceptu porodične/obiteljske medicine pruža 228 timova porodične/obiteljske medicine što je za 14,00% više u odnosu na prethodnu godinu.

Prosječan broj registrovanih osiguranih lica po timu porodične medicine u 2012.godini je 1.513 što je 15,69% manje od prosječnog broja u 2011.godini, a rezultat je većeg broja prijavljenih timova i manjeg broja registrovanih lica za 2012. godinu.

Primarni zadatak Ministarstva u 2012.godini je reforma u oblasti porodične medicine čijim ostvarenjem će se unaprijediti kvaliteta, pristupačnost i ujednačenost korištenja primarne zdravstvene zaštite.

Formiran je Tim za verifikaciju timova porodične /obiteljske medicine na Tuzlanskom kantonu sa zadatkom da utvrdi ispunjenost uslova za dodjelu ugovora za svaki tim pojedinačno. Provođenje monitoringa i evaluacije rada uspostavljenog sistema porodične medicine na cijelom području Tuzlanskog kantona kao i ocjena i priznavanje timova porodične medicine vršena je u skladu sa Instrukcijom o ispunjavanju osnovnih uvjeta za priznavanje porodične medicine i Uputstvom za provedbu Instrukcije o ispunjavanju osnovnih uvjeta za priznavanje porodične medicine.

Verificirano je 228 timova porodične medicine sa jasnim zadacima za unapređenje rada timova u roku od šest mjeseci, kada će biti slijedeća verifikacija.

U 2012.godini nastavljena je implementacija Projekta jačanja zdravstvenog sektora-dodatno finansiranje (HSEP) jer je Projekat jačanja zdravstvenog sektora 2006-2011 uspješno okončan

Nastavak projekta se provodio u skladu sa revidiranim projektnim dokumentima za dodatno finansiranje.

Ova komponenta podržava nastavak jačanja vještina timova pododične medicine kroz dodatnu obuku iz porodične medicine, nastavak programa specijalizacije iz porodične medicine, kao i podršku u akademskom razvoju osoblja edukativnih centara porodične medicine.

Uz obuku nastavljena je i adaptacije i opremanje ambulanti porodične medicine. Projetom je obuhvaćeno i provođenje preventivno promotivnih zadataka za timove porodične medicine, realizacija ugovora zasnovana na učinku sa odabranim timovima i pokrenut je proces informatizacije primarne zdravstvene zaštite.

U saradnji sa Federalnim Ministarstvom zdravstva u okviru Projekta jačanja zdravstvenog sektora u 2012. Godini, realizovan je program IV faze Projekta i adaptirano je i opremljeno 13 ambulanti na području Tuzlanskog kantona, i to:

- JZU Dom zdravlja Čelić - Ambulanta Ratkovići
- JZU Dom zdravlja Doboј Istok - Ambulanta u centralnom objektu
- JZU Dom zdravlja Gradačac - Ambulanta Rajska
- JZU Dom zdravlja Lukavac - Ambulanta Prokosovići
- JZU Dom zdravlja Sapna - Ambulanta Vitinica
- JZU Dom zdravlja Srebrenik - Ambulanta u centralnom objektu
- JZU Dom zdravlja Živinice - Ambulanta Seona
- JZU Dom zdravlja Tuzla - Ambulanta Podgajevi
- JZU Dom zdravlja Tuzla - Ambulanta Šišići
- JZU Dom zdravlja Tuzla - Ambulanta u centralnom objektu
- JZU Dom zdravlja Tuzla - Ambulanta Dobrnja
- JZU Dom zdravlja Tuzla - Ambulanta Kiseljak
- JZU Dom zdravlja Tuzla - Ambulanta Solana

-Preventivne aktivnosti

U 2012. godini Ministarstvo zdravstva i Zavod za javno zdravstvo su kontinuirano pratili sve pojave obolijevanja i poduzimali mjere prevencije za zaštitu stanovništva Tuzlanskog kantona. Stručni tim Ministarstva zdravstva koga čine predstavnici Zavoda za javno zdravstvo, Ministarstva zdravstva, UKC-a Tuzla, Kantonalne uprave civilne zaštite i Zavoda zdravstvenog osiguranja TK a je pratio epidemiološku situaciju pripreme zdravstvenog sistema TK za odgovor u slučaju pojave oboljenja, koordinirao provođenje mjera nadzora i prevencije među zdravstvenim ustanovama na TK.

Tokom cijelog perioda Zavod za javno zdravstvo Tuzlanskog kantona bio je sjedište aktivnosti Stručnog tima i praćenja kretanja bolesti. Svo vrijeme postojala je stalna komunikacija sa višim i nižim nivoima zdravstvenog sistema i koordinacija u sistemu na Tuzlanskom kantonu. Efikasno su provedene sve neophodne mjere u zdravstvenom sistemu. Izdvojena su dodatna sredstva iz Zavoda zdravstvenog osiguranja TK za nabavku neophodnih vakcina i seruma.

-Edukacija kadrova u oblasti zdravstva i upravljanje kadrovskim potencijalom

Ministarstvo zdravstva je i u 2012.godini, aktiviralo proces edukacije za medicinsko i nemedicinsko osoblje iz kardiopulmonalne reanimacije po Programu koji je donijelo Ministarstvo zdravstva, kao obavezna edukacija koja se provodi u Kantonalnom edukativnom centru Hitne medicinske pomoći. Za ljekare lidere timova HMP vrši se i edukacija iz dodatnih postupaka kardiopulmonalne reanimacije.

Pripremljen je prijedlog plana specijalizacija i subspecijalizacija zdravstvenih radnika za područje Tuzlanskog kantona koji je odobrilo Federalno ministarstvo zdravstva.

Plan je sačinjen na osnovu prijedloga Zavoda za javno zdravstvo TK i potreba zdravstvenog sistema.

Posebno su vođene aktivnosti koordinacije i izvještavanja zdravstvenih ustanova primarne zdravstvene zaštite i utvrđivanje potreba pojedinih domova zdravlja za kadrom iz oblasti porodične medicine (specijalizacije i PAT program edukacije).

U Domu zdravlja u Tuzli, u Edukativnom centru porodične medicine, uspješno se provodi program dodatne obuke iz porodične medicine i nastavljeni specijalistički programi za specijalizante.

-Unapređenje oralnog zdravlja djece prvih razreda osnovnih škola u Federaciji Bosne i Hercegovine

U saradnji sa kantonalnim ministarstvima zdravstva u cijeloj Federaciji, Federalno ministarstvo zdravstva zajedno sa Federalnim zavodom zdravstvenog osiguranja i reosiguranja-Fonda solidarnosti i Federalnim zavodom za javno zdravstvo i domovima zdravlja realizovalo i u 2012. godini Projekat edukacije prvih i drugih razreda osnovnih škola o higijeni zuba i usta.

Obuhvaćeni su učenici i prvih i drugih razreda osnovnih škola u Federaciji.

Preko kantonalnog koordinatora iz Ministarstva zdravstva TK, u saradnji sa edukatorima-stomatolozima iz domova zdravlja sa područja Tuzlanskog kantona, a uz podršku Ministarstva obrazovanja, nauke kulture i sporta TK, edukacija djece prvih i drugih razreda osnovnih škola na Tuzlanskom kantonu je uspješno realizovana.

Svi učenici prvih i drugih razreda na TK su imali edukaciju koja je obavljena kroz predavanje na način da se djeci približi značaj važnosti održavanja higijene usta i zuba, kako bi se prevenirale bolesti zuba.

Također, na demo modelima je demonstrirano pravilno pranje odnosno četkanje zuba, svakom učeniku je dodjeljen simboličan poklon, zubalica-bojanka i raspored časova, kao i brošurice za roditelje da pročitaju nekoliko rečenica o ovoj tematici.

-Organizovanje „Marša mira“ Srebrenica-Potočari, u julu 2012.godine

Ministarstvo zdravstva je i u 2012.godini, u saradnji sa domovima zdravlja uspješno organizovalo sanitetsko obezbjeđenje dženaze/ukopa u Potočarima na dan 11.07.2012.godine i „Marša mira“ u periodu 08.07. do 11.07.2012.godine., (dio programa koji se odnosi na Tuzlanski kanton), koji nadzire i u cjelosti organizuje Federalno ministarstvo zdravstva.

Tuzlanski kanton je obezbijedio ukupno 13 mobilnih ekipa, jednu hiruršku ekipu za intervencije JZU UKC Tuzla te pripravnost JZU UKC Tuzla i heliodroma i Centar urgentne medicine u JZU Dom zdravlja Kladanj.

Četiri mobilne ekipe i jedna hiruška ekipa je obezbijeđena za dan 11.07.2012.godine na dan dženaze/ukopa, a devet mobilnih ekipa je učestvovalo u pratnji učesnika „Marša mira“.

Saradnja sa nevladinim sektorom

Saradnja sa nevladinim sektorom je bila intenzivna i odnosila se na preventivne programe, akcije podizanja svijesti građana o aktuelnim zdravstvenim problemima, prevenciji bolesti ovisnosti i rehabilitaciji i resocijalizaciji ovisnika. Udruženja koja okupljaju oboljela lica obraćala su se ministarstvu zdravstva sa različitim zahtjevima u smislu podrške određenim projektima, unapređenja organizacije zdravstvene zaštite, obezbjeđenja određenih lijekova itd.

Ministarstvo je vodilo dosta aktivnosti na tom planu omogućavajući da se svi realni zahtjevi realiziraju i olakša pružanje zdravstvene zaštite i unaprijedi preventivna zdravstvena zaštita.

Na zahtjev Udruženja Roma Ministarstvo zdravstva je u saradnji sa zdravstvenim ustanovama i u 2011.godini organizovalo „Sedmicu zaštite zdravlja Roma na Tuzlanskom kantonu u peripodu od 26. 09. Do 01.10.2011.godine. U zdravstvenim ustanovama su izvršeni pregledi svih pripadnika Romske poulacije koji su se javili u zdravstven ustanove. Prema dostavljenom izvještaju ukupno je pregledano 140 djece i 146 lica iznad 18 godina.

-Ostale aktivnosti

Ministarstvo zdravstva je u 2012.godini učestvovalo u aktivnostima koje su vođene sa nivoa Bosne i Hercegovine i Federacije Bosne i Hercegovine.

Predstavnici Ministarstva su učestvovali u:

- Projektu regionalne edukacije iz koordinirane brige u oblasti mentalnog zdravlja,
- Projektu jačanja zdravstvenog sektora,
- Realizacija projekta ranog rasta i razvoja djece i potpisivanje Protokola o saradnji u oblasti unapređenja ranog rasta i razvoja djece Tuzlanskog kantona,
- Realizaciji politika za unapređenje ishrane djece u Federaciji BiH,
- Provođenju studije o pravima djeteta,
- Izradi politike za stare osobe u Bosni i Hercegovini

Na zahtjev Federalnog ministarstva zdravstva dalo mišljenja na:

- Nacrt Zakona o liječništvu, Nacrt Zakona o sestrinstvu i primaljstvu, Nacrt Zakona o izmjenama i dopunama Zakona o zaštiti osoba sa duševnim smetnjama, Prednacrt zakona o hemikalijama, Prednacrt zakona o biocidima i Prednacrt zakona o liječenju nepolodnosti biomedicinski podpomugnutom oplodnjom.

IV Kapitalni projekti

U skladu sa donesenim Planom za javne nabavke Ministarstva zdravstva Tuzlanskog kantona u 2012.godini, izvršena je nabavka jednog PC računara, jednog laserskog printera, softvera i antivirusnog programa sa licencom ukupne vrijednosti 2.118,03 KM. Nabavljena je i elektronska oprema: projektor sa opremom za upravljanje i korištenje, električnim projekcionim platnom i platnom na stalku, daljinski upravljač i jedan diktafon sa uslugom montaže ukupne vrijednosti 3.581,01 KM.

Izvršena je i nabavka materijala i sanitarija i zamjena istih u dva toaleta u ukunjoj vrijednosti od 978,12 KM, nabavka i ugradnja etisona u količini od 205 m2 ukupne vrijednosti 5.095,00 KM, i usluge krećenja službenih prostorija u količini od 605 m2 ukupne vrijednosti 1.408,62 KM.

Sve navedene nabavke realizovane su sredstvima iz vlastitih prihoda Ministarstva.

V Ocjena stanja

Ministarstvo je u toku 2012.godine, realizovalo sve planske i programske aktivnosti koje su planirane Programom rada Vlade Tuzlanskog kantona za 2012.godinu.

Osim planiranih aktivnosti realizovano je i niz aktivnosti koje su bile neophodne u cilju efikasnijeg funkcionisanja zdravstvenog sistema na području Tuzlanskog kantona naročito u implementaciji reformskih procesa u primarnoj zdravstvenoj zaštiti.

Zdravstveni sistem Tuzlanskog kantona je dobro razvijen i stabilan. Kao takav je od izuzetnog značaja za život, očuvanje i unapređenje zdravlja, što je interes svakog društva.

Važano je istaći da su u dijelu programiranja i finansiranja zdravstvene zaštite za 2012.godinu, a shodno Odluci o jedinstvenoj metodologiji kojom se bliže utvrđuju kriteriji i mjerila za zaključivanje ugovora između nadležnog zavoda zdravstvenog osiguranja i zdravstvene ustanove, a koja će se početi primjenjivati od 2012.godine, donesen je Plan i program mjera za unapređenje zdravstvene zaštite iz obaveznog zdravstvenog osiguranja za područje Tuzlanskog kantona za 2012. godinu.

Program zdravstvene zaštite temelji se na demografskoj analizi, analizi i ocjeni zdravstvenog stanja osiguranih lica u prethodnoj godini, identifikaciji problema u provođenju programa zdravstvene zaštite i finansiranju u prethodnoj godini i ocjeni prioriteta u narednoj godini. U cilju što uspješnijeg i ekonomičnijeg unapređenja zdravlja i liječenja programom zdravstvene zaštite se obezbjeđuje pružanje određenog obima i sadržaja zdravstvenih usluga za osigurana lica – korisnike, radi zadovoljenja njihovih potreba.

VI Programska orijentacija

S ciljem osiguranja uslova, da svi građani i osigurana lica na području Tuzlanskog kantona mogu ostvariti pravo na zdravstvenu zaštitu i mogućnost ostvarivanja najvišeg mogućeg nivoa zdravlja kroz sistem zdravstvene zaštite, u oblasti zdravstva vodit će se aktivnosti u pravcu osiguranja mjera na uređenju i vođenju zdravstvene politike i provođenju reforme iz oblasti zdravstva od interesa za područje kantona.

Aktivnosti će biti usmjerene na stvaranju uvjeta za pristupačnost i ujednačenost korištenja primarne i sekundarne zdravstvene zaštite, rad na reorganizaciji rada zdravstvenih ustanova, uspostavljanje sistema poboljšanja kvaliteta i sigurnosti zdravstvene zaštite, praćenju zdravstvenog stanja stanovništva i rada zdravstvenih ustanova na području kantona, kao i staranje o provođenju utvrđenih prioriteta u zdravstvenoj zaštiti.

1. Vizija

Stvoriti zdravstveni sistem u kojem je kvalitetna zdravstvena zaštita dostupna svima, prema načelima sveobuhvatnosti, dostupnosti i solidarnosti.

2. Misija

Zaštita i unapređenje zdravlja stanovništva u cjelini koje obuhvata zaštitu javnozdravstvenog interesa, rano prepoznavanje rizika bolesti, sprečavanje bolesti, liječenje i rehabilitaciju bolesnih.

3. Ciljevi

Cilj 1. Nastavak započetih aktivnosti za dalji razvoj JZU UKC Tuzla kroz uvođenje promjena u:

- planiranju rada i razvoja a posebno finansija,
- organizovanju i kontroli uz efikasno upravljanje ljudskim resursima, što će omogućiti stabilizaciju i finansijsku konsolidaciju ustanove koja ima prioritetan značaj u zdravstvenom sistemu Tuzlanskog kantona.

Cilj 2. Reorganizacija i usklađivanja javnih zdravstvenih ustanova što uključuje:

- reorganizaciju i usklađivanje bolničkih zdravstvenih ustanova i zdravstvenih ustanova primarne zdravstvene zaštite na području Tuzlanskog kantona,
- preuzimanje osnivačkih prava u skladu sa Zakonom o zdravstvenoj zaštiti.

Cilj 3. Realizacija preventivnih programa rane dijagnostike koja obuhvata:

- prevenciju i ranu dijagnostiku karcinoma dojke,
- prevenciju i ranu dijagnostiku karcinoma grlića maternice, i
- prevenciju i ranu dijagnostiku kolorektalnog karcinoma.

Cilj 4. Nastavak implementacije projekta jačanja zdravstvenog sektora – HSEP kroz:

- provođenje verifikacije timova porodične/obiteljske medicine,
- kontinuirani monitoring i evaluaciju rada uspostavljenog sistema porodične medicine, i
- adaptacija i opremanje ambulanti porodične medicine na području kantona-šesta faza

Cilj 5. Uspostava organizacije i funkcionisanja specijalističko konsultativne djelatnosti u skladu sa:

- dosljednom primjenom Instrukcije o načinu organizovanja i finansiranja specijalističko-konsultativne djelatnosti na području Tuzlanskog kantona, i
- utvrđivanje potrebnih i raspoloživih ljudskih i materijalno-tehničkih resursa za uspješno organizovanje i funkcionisanje specijalističko konsultativne djelatnosti

Cilj 6. Informatizacija zdravstvenog sistema na području kantona, kroz izgradnju informacijskog i komunikacijskog sistema kojim se osigurava sigurno i dugotrajno funkcionisanje, fleksibilnost i učinkovitost, što obuhvata:

- izrada Akcionog plana na implementaciji Idejnog rješenja informatizacije zdravstvenog sistema na području Tuzlanskog kantona,
- interdisciplinarnu saradnju timova ljudi zaduženih za planiranje, razvoj, implementaciju i njihovo djelovanje.
- razvoj, implementaciju i integraciju postojećih informacijskih sustava u cjeloviti informacijski sistem zdravstva (e-zdravstvo),
- osiguranje potrebnih finansijskih sredstva u budžetu Tuzlanskog kantona i Zavodu zdravstvenog osiguranja.

Ostale aktivnosti u 2013. godini u okviru zdravstvenog sistema bit će usmjerene na slijedeće:

- redovna revizija i usklađivanje Pozitivne liste lijekova Tuzlanskog kantona u cilju obezbjeđivanja prava osiguranim licima na lijekove sa Liste esencijalnih lijekova.,

- pokretanje aktivnosti na izradi detaljne analize rada službi specifične zdravstvene zaštite radnika – medicine rada na području Tuzlanskog kantona i sagledati mogućnosti njene reorganizacije u pravcu formiranja zavoda za medicinu rada odnosno zdravstvene ustanove za specifičnu zdravstvenu zaštitu radnika,

- aktivnosti sistema kvaliteta i sigurnosti zdravstvenih usluga u zdravstvenim ustanovama voditi ka završetku procesa akreditacije,

- nastaviti aktivnosti na stalnom unapređenju kvaliteta pružanja zdravstvenih usluga naročito kroz kontinuiranu stručnu edukaciju zdravstvenih radnika i zdravstvenih saradnika u

Edukativnom centru i kroz plansko usmjeravanje zdravstvenih radnika na specijalizacije i subspecijalizacije,

- nastavak aktivnosti na usklađivanju propisa iz oblasti zdravstvene zaštite i zdravstvenog osiguranja sa federalnim propisima.

VII Izvršavanje planiranih kontinuiranih poslova

Ministarstvo zdravstvo Tuzlanskog kantona je u okviru svojih nadležnosti pri rješavanju upravnih stvari u upravnom postupku postupalo u skladu sa Zakonom o upravnom postupku («Službene novine Federacije Bosne i Hercegovine», broj: 2/98 i 48/99) i drugim važećim propisima. Materijalni propisi iz kojih proizilazi nadležnost za postupanje Ministarstva zdravstva su:

1. U postupku donošenja rješenja o ispunjenosti propisanih uvjeta u pogledu prostora, kadra i medicinsko-tehničke opreme za obavljanje javne zdravstvene djelatnosti i privatne prakse u privatnoj zdravstvenoj djelatnosti,

- Zakon o zdravstvenoj zaštiti („Službene novine FBiH“, broj 46/10)
- Zakon o apotekarskoj djelatnosti („Službene novine FBiH“, broj 40/10):
- Zakon o upravnom postupku („Službene novine FBiH“, broj 2/98 i 48/99):

2. U postupku donošenja rješenja u prvostepenom postupku po zahtjevima zdravstvenih radnika srednje stručne spreme za odobravanje polaganja stručnog ispita, sprovođenje postupka polaganja stručnih ispita i izdavanje uvjerenja o položenom stručnom ispitu,

- Zakon o zdravstvenoj zaštiti („Službene novine FBiH“, broj 46/10)
- Pravilnik o pripravničkom stažu i stručnom ispitu zdravstvenih radnika („Službene novine FBiH“, broj 6/11, 10/11 i 41/11)

3. U postupku izdavanja uvjerenja o činjenicama iz službene evidencije
Zakon o upravnom postupku: („Službene novine FBiH“, broj 2/98 i 48/99):

U 2012. godini, po zahtjevu stranke, pokrenuta su ukupno 438 prvostepena upravna postupka i to:

- 138 zahtjeva za izdavanje rješenja o ispunjenosti propisanih uvjeta u pogledu prostora, kadra i medicinsko-tehničke opreme za obavljanje javne zdravstvene djelatnosti i privatne prakse u privatnoj zdravstvenoj djelatnosti;
- 300 zahtjeva za odobravanje polaganja stručnih ispita za zdravstvene radnike srednje i više stručne spreme.

U prvostepenim postupcima za izdavanje rješenja o ispunjenosti propisanih uvjeta u pogledu prostora, kadra i medicinsko-tehničke opreme za obavljanje javne zdravstvene djelatnosti i privatne prakse u privatnoj zdravstvenoj djelatnosti, za 31 zahtjeva nije u potpunosti ispoštovan zakonski rok iz člana 216. ZUP-a, iz razloga nedovoljnog broja uposlenih koji su kvalifikovani za vršenje ovih poslova i što su zahtjevi stranaka podneseni sa nepotpunom dokumentacijom.

Moramo naglasiti da u 2012. godini, do kraja avgusta nije bilo popunjeno upražnjeno radno mjesto „Stručni savjetnik za normativno-pravne poslove, upravno rješavanje i personalne poslove“ tako da je u tom periodu ove poslove izvršavao sekretar ministarstva kao jedini državni službenik-diplomirani pravnik.

Nedostajuća dokumentaciju se uglavnom se odnosi na rješenja u vezi sa prostorom za obavljanje zdravstvene djelatnosti (urbanistička, građevinska i upotrebna dozvola) koju izdaju općinske službe i postupci traju po nekoliko mjeseci, a istu je trebalo u toku postupku pribaviti.

Protiv upravnih akata donesenih u upravnom postupku pokrenutom po zahtjevu stranke podnesene su dvije žalbe koje su odbijene rješenjem Federalnog ministarstva zdravstva. U 2012. godini, u Ministarstvu je izdato 380 uvjerenja po članu 169. Zakona o upravnom postupku od čega 283 uvjerenja o položenom stručnom ispitu za zdravstvene radnike srednje i više stručne spremae i 97 uvjerenja o činjenicama iz službene evidencije.

Upravni postupak u svim predmetima u periodu I-VIII 2012.godini je vodio i rješavao sekretar ministararstva, a u periodu IX-XII 2012.godine, jedan državni službenik-diplomirani pravnik „Stručni savjetnik za normativno-pravne poslove, upravno rješavanje i personalne poslove“.

VIII-Pregled unutrašnje organizacije, kadrovska i materijalna osposobljenost

Ministarstvo zdravstva vrši upravne i druge stručne poslove koji se odnose na:


- obezbjeđivanje primjene najviših standarda ljudskih prava i sloboda utvrđenih međunarodnim aktima, ustavima i zakonima u oblasti iz nadležnosti Ministarstva;
- razvoj i unapređenje zdravstvene zaštite i zdravstvenog osiguranja u jedinstvenom sistemu zdravstvene djelatnosti;
- unapređenje preventivne zdravstvene zaštite;
- stručno-medicinski nadzor nad radom javnih i privatnih zdravstvenih ustanova i zdravstvenih radnika;
- razvoj naučnoistraživačke djelatnosti u resornoj oblasti;
- preduzimanje i sprovođenje mjera i akcija za sprečavanje i suzbijanje zaraznih bolesti;
- zaštitu od štetnog djelovanja jonizirajućeg zračenja i radijacionu bezbjednost, kao i zaštitu od štetnih uticaja okoline na zdravlje građana;
- promet lijekova, otrova i opojnih droga;
- zdravstveno-statističku djelatnost;
- nadzor nad radom ustanova u oblasti zdravstva;
- vođenje registra ustanova zdravstvene zaštite za područje Kantona;
- pripremanje nacrtu zakona i drugih propisa iz nadležnosti Ministarstva;
- rješavanje o upravnim stvarima iz nadležnosti Ministarstva;
- vođenje inspekcijskog nadzora u oblastima iz nadležnosti Ministarstva;
- vođenje i drugih poslova u skladu sa zakonom.

Ministar je u 2012. Godini donio novi Pravilnik o unutrašnjoj organizaciji Ministarstva zdravstva. Novim pravilnikom je predviđeno formiranje 3 osnovne organizacione jedinice I povećan je broj potrebnih izvršilaca. U toku 2012. Godine ministarstvo je funkcionisalo sa jednom osnovnom organizacionom jedinicom - odjeljenje za zdravstvo, bez unutrašnjih organizacionih jedinica.

Dio poslova iz nadležnosti Ministarstva obavljali su pojedini izvršiooci izvan osnovne organizacione jedinice, kako je utvrđeno Pravilnikom o unutrašnjoj organizaciji. Na dan 31.12.2012. u Ministarstvu je bilo zaposleno ukupno 8 zaposlenika: ministar, 5 državnih službenika i 2 namještenika.

Neophodno je istaći da je zbog nedovoljnog broja uposlenih državnih službenika otežano blagovremeno i efikasno izvršavanje poslova iz nadležnosti Ministarstva.

ORGANIZACIONA ŠEMA MINISTARSTVA ZDRAVSTVA TUZLANSKOG KANTON



IX-Način ostvarivanja saradnje sa drugim organima i institucijama

U izvršavanju poslova Ministarstvo je dužno saradivati sa organima uprave drugih nivoa vlasti u svim pitanjima koja su od zajedničkog interesa. Saradnja je ostvorena sa drugim kantonalnim organima uprave i organima Federacije Bosne i Hercegovine u pogledu izvršavanja zajedničkih nadležnosti Kantona i Federacije BiH, kao i u pogledu jedinstvene i pravilne primjene Federalnih propisa, kao i sa općinskim organima i službama za upravu u pogledu jedinstvene i pravilne primjene Kantonalnih i općinskih propisa.

Saradnja se ogleda u zajedničkom radu na iznalaženju rješenja o pitanjima za koja je neophodna interesorna saradnja, na međusobnom informiranju, dogovaranju, dostavljanju i razmjeni podataka i informacija naročito koji su od značaja za ostvarivanje prava i obaveza građana i pravnih lica, kroz rad u zajedničkim komisijama i drugim radnim tijelima, organizaciji savjetovanja i drugih oblika saradnje od zajedničkog interesa.

U 2012. godini Ministarstvo je redovno dostavljalo informacije i podatke koji su traženi od Institucije Ombudsmena.

MINISTAR

Prof. dr. med.sci. Nada Pavlović-Čalić